

IBIGWI BY' UBUTWARI BWO KUBAHO

Umuhigo wanyu murawesheje, mubaye indashyikirwa muri iyi nkera y'abahizi!
Mugaragaje ubutore kuko mutateshutswe ku mugambi n'intego mwihaye,
Mwimika ubutwari bwo kubaho mugaharanira kuja mbere no kutarushwa.
Mwagaragaje ubwitange buhebuje, mukora ibintu biruhije mushyigikira ubumwe,
Ntimwategekwa n'inda ngo mushakire indamu mu nzira zitemewe muharanira ukuri,
Mugamije kubana neza, gutabarana no gufashanya mu miryango y'abaturanyi.

Mwagiye inama Imana irabasanga, mwishyira hamwe bibaha guhirwa,
Mwarisunganye musumba abigunga, ubufatanye bubyara ubuvandimwe murasangira,
Ibibazo bibonerwa ibisubizo mu busabane, mu kuremerana, mu misanzu n'ubudehe...
Mwita ku batishoboye n'abanyanteye nke, mushyigikira abatagira kivurira,
Mwunga ubumwe mwisungana mu byiza no mu byago murwanya ibiza n'uburwayi,
Mushingira ku bumwe nk'inkingi itejegajega ituma mugera ku iterambere.

Mu gihe icuraburindi ryari ribundikiye ikirere cya Karama amacakubiri aca ibintu,
Abacikacumu bari mu gihirahiro cy'amayira abiri hagati ya nyakuzimu na nyabuzima
Batagira kivurira kubera kutagira kivugira, baraheranywe n'ubwoba, ubwihebe n'agahinda,
Abakoze itsembabwoko na bo bumva bari mu mazi abira, bambaye ipfunwe, ifubitse urwikekwe,
Kubera ibikorwa by'ubugome n'urugomo ndengakamere bakoreye bagenzi babo

Icyo gihe mwiyeje gusasa inzobe mu kibaya cy'ubworoherane, mu kirambi cy'ubumuntu,
Gacaca ica inzigo, inzika n'inzangano, ubutabera buca akanzu k'imbabazi,
Musangira ku mazi afutse yavubutse mu isoko y'iriba ryafukuwe n'abunzi n'abahwituzi,
Mwamagana imitekerereze iheza abo mudasangiye isano rishingiye ku bwoko
Murwanya icyenewabo n'ikimenyane bitonesha cyangwa bigaha umuntu icyo adakwiriye,
Mushyira imbere ubunyarwanda, musenyera umugozi umwe muha agaciro ubuvandimwe.

Mwiyeze kubahana no kwihanganirana, uwahemukiye undi yemera guca bugufi,
Yemera ikosa asaba imbabazi ndetse yitegura guhanwa no gutanga icyiru,
Uwiciwe nawe atanga imbabazi, ineza inesha inabi ukuri gutanga ikizere cy'umucyo,
Imfungwa ziragemurirwa kandi ziragororwa, imfubyi n'abapfakazi baragobokwa;
Ituze, amahoro n'umutekano bihamagara iterambere, ubu mwese murakungahaye...

Kubera uwo musanzu udasanzwe muhawe igihembo cy'ubumwe
Ni urwibutso rw'ubutore, rugamije kubarata ibigwi, ishema n'ubutwari,
Ni ikimenyetso cy'ishimwe kubera ibikorwa bihebuje mwagaragaje,
Ni igisingizo cyashyizweho n'Umuryango Unity club intwararumuri,
Kigenerwa umuntu ku giti cye cyangwa ishyirahamwe ryabaye indashyikirwa,
Mu myitwarire n'imikorere ntangarugero mu kubumbatira ubumwe bw'abanyarwanda.

Nimutambuke mutere intambwe musanganire uwo Mutangamata, Nyakubahwa Madamu
Jeannette Kagame, umuyobozi wa Unity Club, abashyikirize ishimwe ryanyu.

NTIMUGACOGORE!